



Fegl d'infurmaziun davart l'avertura da dretg

Attenziun: Sche Vus n'essas betg giurista u giurist u n'avais betg blera experientscha en fatschentas giuridicas, As vegnan a gidar ils suandants renviaments mo en cas simpels. En cas pli delicats S'infurmai tar personas spezializadas e versadas en dumondas giuridicas, per exempel tar in'avvocata u tar in advocat. La dretgira n'As po betg porscher ina cussegliaziun, perquai che las personas che lavuran qua pudessan forsa vegnir refusadas autramain sco implitgadas. Ultra da quai èn ils renviaments simplifitgads, pervia da quai betg dal tutfatg precis, ed els na cumpiglian betg tut ils cas pussaivels.

Procedura

La procedura d'avertura da dretg è ina procedura summarica e las cumprovas vegnan procuradas da princip cun documents. Auters meds da cumprova vegnan acceptads mo en cas excepziunals. Normalmain na datti nagina segunda correspundenza. Quai vul dir che l'emprima inoltraziun tar la dretgira sto esser cumpletta. Inoltraziuns insuffizientas pon avair per consequenza che la dumonda fa naufragi. Quai po esser collià cun custs considerabels.

Cumpetenzza

Da princip sto l'avertura da dretg succeder al lieu da scussiun. Sche la partida debitura è ida davent, sto la dumonda d'iniziar la procedura d'avertura da dretg vegnir fatga al nov lieu da domicil.

Inoltraziun

La dumonda sto cuntegnair ina pretensiun da dretg ed ina motivaziun cun tut ils fatgs decisivs. (Tge vul la partida petenta da la cuntrapartida ed or da tge)? L'avertura da dretg po vegnir concedida mo per pretensiuns ch'èn vegnidas suttamessas a la scussiun.

Partidas e represchentanza

Las partidas ston esser identicas cun quellas sin l'avis da pajament. Las represchentanzas da personas giuridicas ston avair il dretg da suttascriver. Tgi ch'è incumbensà cun la represchentanza, sto avair in plainpudair sco er il dretg da manar in process.

Pretensiun da dretg

L'exempel suandant sto mintgamai vegnir adattà al cas singul respectiv:

1. En la scussiun nr. 123 da l'Uffizi da scussiun dad X stoppia vegnir concedida in'avertura da dretg definitiva/provisorica per 100.00 francs plus in tschains da 5 % per onn dapi il 01-01-2018 sin 100.00 francs.
2. Cun metter a quint ils custs e l'indemnisaziun a la cuntrapartida da la dumonda.

Motivaziun

A la dumonda ston en mintga cas vegnir agiuntads ils suandants documents plus ina glista da tals:

- plainpudair
- avis da pajament
- titel per avrir la procedura da dretg:

- a) In **titel definitiv per avrir la procedura da dretg** è avant maun, sche la pretensiun ch'è vegnida fatga valair resulta d'ina sentenza giudiziala executabla u d'ina disposiziun executabla pronunziada d'autoritads administrativas svizras. A las decisiuns sto vegnir agiuntada in'attestaziun da la vigur legala.
- b) In **titel provisoric per avrir la procedura da dretg** sa basa sin ina renconuschientscha dal debit tras la debitura/il debitur. Ina tala è avant maun, sche la debitura/il debitur ha confermà cun sia sutscriziun da debitar ina tscherta summa da daners resp. ina summa da daners ch'è immediatamain constatabla. Er contracts bilaterals (sco p.ex. contracts da locaziun, contracts d'emprest, contracts da cumpra e.u.v.) pon dar il dretg da far in'avertura da dretg provisorica. E-mails u spirs quints senza sutscriziun da la debitura/dal debitur na bastan betg!

Glista da las agiuntas ed inoltraziun

- sin in feagl separà
- mintga document sto esser numerà cun excepziun dal plainpudair
- designaziun exacta da mintga document incl. data
- las inoltraziuns ston vegnir consegnadas en dus exemplars (per la dretgira e per la cuntrapartida)

Attenziun

Sch'i n'è avant maun ni ina sentenza (disposiziun, decisiun) ni ina renconuschientscha dal debit *suttascritta*, na po betg vegnir pretendida in'avertura da dretg. En tals cas, nua ch'igl è avant maun meds da cumprova main fermes, sto vegnir inchaminada la via ordinaria d'in process, normalmain sur l'autoridad da mediaziun. En cas da malsegirezzas èsi recumandabel da consultar ina persuna dal fatg.

L'uffizi da mediaziun responsabel chattais Vus cun quest link:

<https://www.justiz-gr.ch/2/autoritads-da-mediaziun/tgi-essan-nus/uffizis-da-mediaziun/>